

CIU' SULU RI PRIMA

Sautànnu rô muru
si trova 'n mienzu a 'na strata,
sulu,
comu 'n cani.
Talia ccà e ddà
cu l'uocci piàtusi
e aruci :
Putissi truvàri 'n'amicu
o 'n patruni
o, armenu, 'n'uòssu,
ppâ fami.
E parti, pinnuliannu,
cô nasu pizzutu.
Ma s'affira a 'n filu r'aria,
ca 'u porta rittu
a sciauriàri 'na zotta.
E dduòcu si ferma.

Truniannu
arriva 'n surruscu,
sparatu.
'I rintra c'è unu 'nciùsu,
ca jàvi prescia,
superbu, senza nasu,
e nunn'addinga l'ammitu a sciauriari
'n cumpagnia.
E ri supra ci passa ,
ccussì veloci, ca appena s'adduna:
"Tantu è 'n cani bastardu".

E dduòcu arresta
luoncu stisu,
ciù sulu ri prima,
'n ca nunn'àvi mancu nu strazzu r'arma,
ca 'u piulia.

Se armenu ci fussi 'na manu piatusa
ca 'u scanziassi
supra 'n munziedu 'i cuticcia.